



府志

卷

一
列傳

孝子

母

袁州府志卷之十

人物列傳

袁山峯巉峻湍瀨迅奔故其人象之多磊落不羣
至德行忠節經術文章後先相望歷歷可考紀實
詒遠聞者其興乎

漢

陳重字景公宜春旌儒鄉人

今隸分宜

少與鄱陽雷義友

善俱學魯氏詩顏氏春秋郡太守張雲舉重孝廉
重以推義不許明年義亦舉與重胥為郎有同署



郎負息數十萬責主日至重代之還而終不言又同舍郎誤持鄰舍郎綉去主疑重重不辯市綉償之後同舍郎至以綉還人服重長者後俱拜尚書郎義黜重亦病免義復舉茂才亦以推重刺史不許義由是不應命時人語曰膠漆自謂堅不如雷與陳未幾三府同時皆辟陳重雷義賢授重細陽長治有異政特遷會稽太守又以司徒辟拜侍御史後二人同隱居鷄足山卒合葬今即其地名陳雷里

彭翼宜春人獻帝朝歷建平長沙海太守封宜春侯

晉

施游宜春人仕爲太常寺博士安南將軍歷九江太守封安成郡宜春侯

梁

湛佗宜陽人仕爲宜猛將軍散騎侍郎

隋

譙德衡宜陽人仕爲信威將軍本州刺史封安成侯

唐

湛賁宜春人初爲州吏其妻與彭伉之妻兄弟也伉擢進士第親族集賀之座皆名士以賁胥獨飯之後閣妻數之曰男子不自振勵顧困辱如此賁由是感憤力學一舉登進士上第伉聞賁舉方跨驢赤板橋驚墮地時人語曰湛賁登第彭伉落驢

彭伉宜春人祖雲玄宗時徵士伉貞元間擢進士第授石泉縣令歷官岳州錄事叅軍有聲

盧肇字子發宜春文標鄉人今隸分宜兒時見宜春令盧

萼竒之曰子異且有聞乎肇于是益力于學舉會

昌二年鄉試入京獻書侍郎王起時起知貢舉遂以名薦擢進士第一授潼關防禦判官初肇之未舉也李德裕謫州長史殊遇肇後肇應進士德裕獲入相見肇至喜曰吾喜爲金榜得狀元矣遂魁天下爲判官雖受裕知己絕無倚附久之使相盧商太尉裴休左僕射盧簡求先後奏辟從事稍遷著作郎除倉部員外郎克集賢院學士進朝散大夫持節欽州諸軍事柱國欽州刺史肇于是觀日月之運察盈虛之理審黃鍾窺碧落倣司馬遷張

衡之書廣相如子雲之奏爲海潮賦且敘其詞以獻賦成上之詔褒諭宣付史館移真宣池二州遷吉州刺史卒所著有文標集子文秀咸通中進士爲長安令有聲官至弘文館學士

易重字鼎臣宜春人會昌間舉進士第二是年張洎第一會有詔覆試洎黜以重代之官至大理評事著文千餘篇今亡游宦筠之上高袁州狀元在唐有盧易或云韓退之之教也重子贇五代史載作文贇仕南唐雄州刺史子延慶見孝行

盧絳俱肇族子邈唐末預湖南計偕舉進士獻廻文詩二百首官至祕書省正字絳字晉卿南唐初屢舉進士不第入金陵詣後主言當時利害請自京口至澗壁立柵戍守要害數十事疏入未報又書謁光政使陳喬與語竒之表絳光政院承旨尋轉沿江兵馬監押絳募人習水戰得馬雄等教之進退行列旋運如飛屢獲吳越舫艦以獻宋師渡江後主召絳爲凌波軍都虞侯稍遷沿江都部署吳越王錢俶以兵助宋克常州進攻澗絳以兵

師逼京口而陳破吳越軍授潤州節度使時守將
劉澄謀以城附宋絳冒圍奔宣州金陵降絳率其
衆攻新安殺刺史龔慎儀趨福州江南郡縣頗動
宋詔其弟往招之始下及見太祖問之曰臣知事
李氏而已會慎儀兄子侍御史穎訴絳賊殺從父
損辱國威詔執付吏有言絳武勇乞全之太祖曰
絳狀類侯霸榮留之恐自貽患遂殺絳

黃頴字無頴宜春人韓愈爲州刺史頴師之爲文章
遂大振與盧肇齊名素不相下頴鄉試高等而肇

狀元及第會昌末頴亦舉進士爲監察御史有文

一千篇行于世

一作云千
疑作十

鄭史字惟直宜春人開成元年進士爲易學博士積
官永州刺史有賦百篇亡又有詩十二首見宜陽
集子啓谷

鄭谷字守愚穎悟絕倫七歲能詩侍郎司空圖嘗與
史同院見谷竒之問曰某詩有病否谷曰嘗見曲
江晚望斷篇云村南落日閒回首一對鴛鴦落渡
頭卽意深矣司空喜拊其背曰當爲一代風騷主

光啓三年中進士第始爲京兆府鄠縣尉後爲拾遺補闕當時正人多稱之乾寧四年以都官郎中退居于仰山東莊之書堂以卒谷詩清婉明白爲薛能李頻所稱其淵源自得窮極理致往往人罕知之僧齊已有詩名以詩謁谷有自封修藥院別下著僧牀之句谷曰善則善矣有一字未安數日復至改云別掃著僧牀谷嘉賞結爲詩友齊已早梅詩云前村深雪裏昨夜數枝開谷曰數枝非早也未若一枝齊已不覺設拜自是士林呼爲一字

師谷始登第與許棠任濤張蠩李栖遠等十八同有聲調之十哲而谷尤以吟詠顯有詩四百篇嘗從僖宗登三峯朝謁之暇寓止雲台道舍自編其集曰雲臺篇傳于世其詠鷓鴣詩尤工號鄭鷓鴣袁皓字退山宜春人博學工著述咸通六年擢進士一第任撫吉二州刺史有治聲龍紀元年自集賢殿一圖書使出採訪圖書二年赴闕卒皓著碧池書三十卷自稱碧池處士又集道林寺詩二卷並見唐藝文志

鍾傳萬載人以負販自業僖宗時討王仙芝有功拜
江西團練使俄拜嶺南節度使檢校太保中書令
爵潁川郡王尋徙南平王黃巢亂後州縣廢貢舉
惟傳歲薦士行鄉飲禮率官屬資以裝齎故士不
遠千里趨之傳少時好射獵嘗醉遇虎與之鬪持
虎不置會人斬虎及貴歎曰士處世尚智謀勿効
暴虎因畫搏虎狀以戒子孫

唐廩萍鄉人乾寧元年登進士科官至禮部正字集
正觀以前文章爲正觀新書三十卷見唐藝文志
廩有詩十四首在宜陽集

南唐

宋齊丘字子嵩萬載人父訥宋志曰誠攝鎮南軍節

唐懷

度使推官守大理評事齊丘少孤好學善屬文兼
習機變權詐之術豫章亂遂隨衆東下時李昇刺
洪州延四方之士往依焉甚被親禮昇移鎮京口
朱瑾之難常叅豫謀議昇入輔政修舉禮法親附
賢士寬徑薄賦民用安輯皆其助焉昇欲進用之
爲徐溫所惡乃以爲殿中軍判官凡十餘年不遷

徐溫卒擢拜左司員外郎累遷諫議大夫兵部侍郎叅議機密甚叶民望吳主欲倚以爲相會請告如豫章改葬其父遂入九華山啓求退居吳主連召不至時李璟爲大將軍遣使諭起之既至除中書侍郎遷右僕射平章事昇受吳禪遷司徒知尚書省以疾乞解職授洪州節度使璟襲位復召爲相俄乞致仕出爲浙西節度使表乞歸九華賜號九華先生封青陽公食青陽縣賦未幾復起爲洪州節度使悉以軍政委寮屬遂爲終焉之計以所居舊里愛親坊爲衣錦坊大起第宅日與寮屬燕樂數歲遷太傅保太十三年周師圍壽春召還都計事明年諸將敗于正陽舉國震恐樞密院陳覺與鎮南節度使李徵古素附齊丘每對璟言齊丘多謀是造國手今患難方殷請委以國事璟不悅又明年璟遣鍾謨李德明相次奉表于周請稱藩世宗使德明復命議割江北諸州以和齊丘言割地無益璟計無所出遂割地內附由是得謝歸青陽卒七十三著化書十卷理訓十卷行于世

沈彬字子文宜春人少好學屬唐末亂離隨計不捷

南游湖湘隱雲陽山與浮圖虛中齊已俱有詩名

尋歸鄉里時李昇鎮金陵旁羅隱逸名儒宿老命

郡縣起之彬赴辟知昇欲取楊氏因獻觀畫山水

圖詩云須知手筆安排定不怕山河整頓難昇覽

之喜遂授祕書郎保太中以尚書郎致政徙居筠

之高安以卒

李徵古宜春萬載人篤學有詞藻南唐登第後以樞密副

使除本州刺史離都日李主賜以內庫酒入宜春

界每經一村落必召耆舊親知藉地飲酒盡歡而

去到郡靜理壁立凜不可干嘗以私財百萬代鄉

人輸稅惜以累賜死互見賢守志

徐鉉字乾瑋廣陵萬載人十歲能文交泰中爲左右廂兵

馬檢校國子祭酒兼御史中丞有才辯時稱爲江

南文士所撰有江南實錄江表志弟錯與鉉齊名

宋李穆使江南見鉉及錯文章歎曰二陸不能及

也入宋累官集賢殿學士所著有說文通釋方輿

記

王穀宜春人南唐初登第長于樂府有鴻門讌苦熱
行暑日觀道傍樹玉樹曲尤膾炙人口其玉樹曲
云內宴明朝日玉樹新妝逞嬌逸三閣霞明天上
開靈鼉震疊神仙出天花數朶風吹綻對舞輕盈
瑞香散金筦紅絃旖旎隨霓裳玉佩參差轉璧月
夜瓊樓春蓮舌泠泠詞調新當時狎客盡尸祿直
諫犯顏無一人歌未闋晉王殿上粘腥血君臣猶
在醉鄉中一面已無陳日月聖唐御宇三百祀濮
上桑間宜禁止請停此曲歸正聲願將雅樂調正
氣穀未第時嘗負氣忤人人欲毆之穀揚聲曰莫
無禮我便是吟君臣猶在醉鄉中一面已無陳日
月者其人歛衽慚謝而退

彭世昌字襲之宜春人謹身修行以名節自持楊行
密據淮楚召爲長史未幾謝病歸隱于郡之修仁
鄉一日有豪猾子數百爲羣劫之曰吾徒遭亂世
未有所託方今德足而智有餘莫若君請隸焉世
昌正色叱曰梁汴之間真人出矣譬之日也四方
鼠輩其猶爝火不息未之有也不知命數而逞無

窮之欲智者不爲也敢辭復請又辭三請之不從
設棘簣繫其上而焚之諸孫仕宦有聲

按嘉定志云自漢迄五代人物得諸傳記有事
迹可書者此外復有唐五十七人止有詩見宜
陽集及登第年甲互見于古圖經題名記今列
其姓名于後

宋 迪

錢 識

賈 譽

謝 萇

謝 防

楊 鴻

楊 堯

易 偲

易之武

魯 受

潘 圖

徐 煥

趙 拙

梁 燭

伊 播

武 灌

劉温其

黎 球

戴 遲

殷 琪

魯 繇

戴光義

何 迎

蔣 肱

晏 璩

陳 炯

何幼遜

易 標

李 旭

晏 墉

徐 瓊

歐陽薰

伍唐珪

潘洵美

袁希古

宋鵬舉

劉仁祥

李餘慶

易廷禎

彭維岳

李 甲

張 爲

謝 辟

陳 嶰

吳 罕

黃 諷

劉 望

李 滄

彭遵 劉廓 周確 梁珪
張咸 許洞 蔣勳 趙防
崔絳

宋

劉式字叔度新喻人 宋以前新喻屬袁州 唐時以春秋公穀之

學舉進士是時張洎主文衡獨放式一人太祖平

江南羈旅入京歷鴻臚大理丞出監通州和豐倉

入判三司都磨勘司時財賦充斥無所明辨式條

其闕漏創主轄支收司姦吏畏服淳化中齋冊往

諭三韓歸轉太常博士嘗賜御書法帖六十軸終

刑部郎官

許載字德輿萍鄉人端拱二年登甲科先是嘗與王

欽若御試因醉再試又中作詩寄親友有只把文

章謁帝居便從平地躡空虛之句終都官員外郎

知歙州

易言字應之宜春人少任俠有口辯真宗朝覆水蠻

寇宜州邊帥不能制募辯士往說之言應召單騎

往酋長迎之喜待之甚恭後竟歸順休兵言書永

和二字于木填之以金因廣西帥遣使入貢真宗嘉之賜以官言任氣居官不能久後元昊擾邊近臣多薦言可任上見其老不欲遣行但令赴流內銓任樞府司戶叅軍

李奇字子正宜春人景祐元年登第嘉祐中任職方員外郎性慷慨不事產業悉以祖產分兄弟仍戒子孫不得遺取既卒族人端以詩哭之有祖來產業分兄弟身後詩書遺子孫之句

易著明字晦之宜春人博學精于聲律累被鄉黨詩人爲之語曰宜春易著明擲地作金聲與石曼卿延年爲詩友太常少卿張羣贈詩有之子宜揚秀一文章甲輩流之句天禧二年賜三班奉職終于左班殿直

朱景陽字仲舒萍鄉人景祐元年登第在官有能名性公介不苟合人有片善稱道不已見纖毫之惡則惡之終職方郎中

李衢字叔達宜春人唐西平郡王晟裔孫也大中祥符元年登第官至屯田員外郎嘗倅釣陽寬慈不

擾後以子贈特進子士安士燮孫珏政和八年登第

夏侯錫分宜人天禧二年進士衡州司理叅軍稍遷
吉州判官歷知南康興化軍皆以善政聞治平中
轉朝奉郎都官屯田郎中致仕子公績元豐八年
進士喬孫士章元末登第官終瑞州路學教授
李士安字永和宜春人以特奏同學究出身爲人不
一妄喜怒累爲州牧後請老得養生之術視聽不衰
年九十七卒官至朝奉大夫

李士燮字和甫初名梁登慶曆六年第後改今名爲
人剛正不撓所至吏民畏愛嘗知彬州人未嘗見
其笑容仕至職方郎中

李觀士安從侄度量如黃叔度文章如元次山嘗著
論有顏子幾之內孔子幾之外之說史傳諸書過
目成誦慶曆二年試南宮賦偶失韻主司嘉其策
特奏名登第時方冠知清江縣事熙寧初爲大官
令會重修御廚奉神宗旨撰記尋言役法不便出
倅括蒼題詩直廳有自知不是公侯骨夜夜江山

入夢來之句元祐初監江州太平興國觀司馬温
公爲相以書召觀觀許之後而淹留江上日久比
至京温公已薨除虔州不就請監南嶽廟以歸觀
嘗創玉谿洞自號玉谿叟爲之傳洞有抱一堂水
仙亭香雪塢錦繡谷常醉吟其中於世味淡如也
少好神仙嘗遇異人劉海蟾後撰萬載燕州神記
及岳州呂公亭記每以得道自任而排斥釋氏至
老不衰將卒數日不食恹覽太平廣記神仙事跡
且曰蓬萊方丈吾其歸乎卒年七十三累官朝議

大夫

朱彥博字元施萍鄉宜風人嘉祐八年進士元豐中

通判潁州秩滿上神宗皇帝書極言當世利害召
見稱旨擢廣西運判尋遷江西運判以勞再任歷
知虔虢解三州及湖北憲副所至有聲嚴明而不
苛察官吏畏之如神仕至朝散大夫

持字知權分宜人少喜學西漢文爲諸生時知軍
州事張顥稀簡接士求見者先令詩賦方得通士
無敢進者持奮曰是謂秦無人矣因入謁顥令作

日新之謂盛德賦藏器待用詩皆立就張大稱賞
 貢入太學與臨江孔武仲齊名擢進士甲科元豐
 間累遷至司農丞出為監司終奉議郎江西提舉
 彭舉正萍鄉人有節行張士遜在相府聞其名辟之
 門下嘗夜試之舉正不為動以特奏名補國子博
 士陞衡州刺史

高漸字善時萍鄉人熙寧末進士寧鄉尉論新法有
 行而未便便而未盡善者凡十策即何正臣上之
 不取同廣州錄事參軍建中靖國初再疏極論其弊

正元祐元符二后君妾之分崇寧初朝廷治上書
 人編管撫州列名黨碑大觀二年預八寶赦與起
 居舍人黃庭堅等同時復官尋召之會卒

梁公价字實臣分宜人少孤力學熙寧中進士調贛
 縣簿稍遷承信郎守四門博士

歐陽中立人初試部郎上書言新法不便以司

馬光門人坐元祐黨籍廢卒弟子私謚節孝先生
 曹傳宜春人元符三年與弟藻子遷同登進士人名
 其堂曰三桂傳官至朝請郎知常州藻宣教郎知

益陽縣遷通直郎知彬州兄子邁崇寧中進士積
官中奉大夫廣西運判直祕閣兼權安撫使

彭俞字濟川宜春人少隱集雲峯學邃于易自號連
山子紹聖四年進士知溧陽縣理冤獄甚多監司
連薦之稍遷至朝散郎俞所著有君子傳三卷循
吏龜鑑十二卷貫通篇五卷時議二卷文集二百
卷

沈莊可分宜人宣和間進士知錢塘縣嗜菊庭植嘗
數百本晚年退居益放情于菊後以九月九日死
朱熹哭之詩曰愛菊平生不愛錢此君原是菊花
仙正當地下修文日恰值人間落帽天生與唐詩
同一脉死隨陶逕葬千年如今忍向西郊哭東野
無兒更可憐

李格字承之萍鄉人幼孤力學雖執爨手不釋卷有
竈前讀書詩一篇傳于時既長通五經目重瞻觀
書五行俱下鄉老曰此吾邦行祕書也登元符三
年進士爲人特立許幹薦于朝以作詩諷新法被
論下獄竟得直歷職州縣同官多憚之嘗著墨梅

墨蘭賦子產論春秋指歸若干卷子著號小山有詩百餘篇

湯夢觀萍鄉人崇寧間舉進士知循州時蠻寇劫掠旁郡恒相戒不犯夢觀境事聞朝廷嘉之除六路坑冶鑄錢提點

蕭杞萬載人宣和六年進士甲科杞學邃于易精大衍之數歷官通判廣州軍州事有治聲稍遷至市舶提舉

李師愈字夢授分宜人宣和間進士調永新簿再遷貴池丞皆不赴扁其堂曰見一取林下見一人之意有集十五卷

鄭銓字應權宜春人學通六經工大字長于詩宣和間兩貢上舍不偶棄歸學者踵門日衆建炎三年金人犯江西銓上書知州事王仲巖言時事責其守城著排姦黨說極論崇寧人才之弊年八十卒又嘗自號應菴學者稱應菴先生

張瑄字子律宜春人少從學邾元鼎熟于典故尤工五言詩歷官州縣以材諤稱立朝靖重不苟守嘉

興卒上念之加直祕閣瑄平居不事生產位至二千石喪歸貧無廬其清約如此然勇于爲義周人之急未嘗以匱乏辭子嗣古

張嗣古宜春人登紹熙庚戌進士甲科歷起居舍人官至中奉大夫直龍圖閣真寧縣開國男食邑三百戶致仕卒嗣古有文名慶元以後凡郡邑紀述文翰多出其手弘碩典麗蔚爲時宗詳見宋宜春郡藝文志

羅尚友字明善萍鄉人少負俊才嘗謁閣門使蕭注令賦詩有人間酒客兼詩客天上文星與將星之句後登進士第授武昌軍節度推官時中丞李常爲帥每燕集必召尚友凡樂語詩詞皆卽席成因目爲席上才子

黃嘉萍鄉人靖康初爲太學生從陳東伏闕上書請誅蔡京及用李綱退詣開封責府尹王時雍曰初見獻熙豐十事將喜君有爲乃今姦邪如此時雍唯唯執政者見嘉輩論事曰諸公日止食國家二升米耳吾徒有愧多矣後終廉州司法叅軍

歐陽椿字永年分宜人本廬陵六一先生之族紹興中進士瑞金主簿稍遷至道州判官改判臨江軍轉儒林郎永州教授進通直郎賜緋魚服未老以奉議郎致仕蕭散林泉號宜林老人有自備集行世

譚綺字德新萍鄉人少嘗事學稍長勇健過倫游京師有堂吏竒之妻以女應募從康王使河北授承事郎及王卽位綺掌飛龍內廐積一日加十三資官至團練使

潘修字文叔萍鄉人年十七領鄉舉入京獻書宰相張浚浚竒之隆興初以累舉特奏名時高宗方圖恢復修謂中興與創垂義同宜法太祖乃稽求國史類錄爲太祖聖謨纂要及陳時務六事從叅廣西軍事討平洞賊李楫著鬱林紀事一篇又上言二廣通販鹽法事宜與當國者異竟格其賞不行致仕弟偃不仕著芻蕘古議五十卷今亾

趙善堅字德固宋宗室家宜春乾道間進士簽書婺州判官朱熹爲浙東常正使器之歲旱賑卹有條

所全活甚多歷官皆有治聲官至戶部尚書

孟浩字養直宜春人乾道間進士知武寧有聲王闢
自豫章召叅大政力薦之朝遷國子監丞出知湖
州與貴幸忤罷歸起爲潼川路轉運判官尋以直
祕閣提舉四川常平茶馬浩狷廉不妄取與強明
精敏洞見事情常以州判官攝臨江軍奉給一無
所受爲文章有法度所著有魁技集

文彥直字益之萍鄉人好學雖避寇山中猶誦讀不
輟紹興初以恩補漢陽軍事判官終淮陽軍節度
推官弟彥光建炎初進士未仕卒

羅長康字偉正宜春人進士歷官寺丞出知永州迎
其父以養因名州署之後堂曰戲綵待制胡寅記
夏執中字子權宜春人父協生女爲孝宗皇后追封
信王補執中承信卽閣門祇候稍遷閣門宣贊舍
人初后去家時協已亾執中貧甚及后物色得之
攜其妻入京或諷使出而別婚貴族執中不應一
日后親與之語執中誦宋弘事以對后默然執中
稍貴卽折節從師學善大字及騎射高宗行慶壽

禮近戚爭獻珍玩執中獨大書一人有慶萬壽無疆以獻高宗喜賜賚甚渥嘗爲館伴副使與金使射連發皆中金人駭服孝宗聞其才將召用之謝曰異日無累陛下保全足矣官至奉國軍節度使提舉萬壽觀封宜春郡公寧宗卽位加少保卒贈太師

胡安之字叔器萍鄉人受業朱晦菴先生之門經史疑義多所著述郡守程公許葺南軒書院聘安之爲諸生講說學者稱自齋先生

孫汲字公善分宜人寄籍臨江應舉由朝散卽監司知其才檄權吉州吉素號煩劇汲居不越月境內稱治時黃庭堅爲泰和令作詩送之曰宜春別駕鄉丈人來假廬陵二千石

孫億字延齡分宜人擢進士第知吉州永新縣吉民歲市縑六萬餘匹主外計者收帑錢以供他費給鹽以償縑直億發其弊吉租歲收四十萬斛漕臣意在聚歛億預戒庾吏定收什二以充羨餘守州約拒臺命出納一用倉式徙知白州卒蒙贈葬余

襄公靖爲誌其墓

易克字正翁號中州分宜人唐狀元重之後幼聰敏
拔羣年十六七博通易書詩號三經處士教授鄉
間遠近從學者甚衆所著有中洲文集

趙若燭字竹逸分宜人景定中進士知光澤縣子嗣
誠博通經史宋亾不仕立教于鄉及其門者衆所
著有詩書經箋註名曰粗通

胡從義萍鄉人少爲吏後刻苦力學中進士甲科仕
至員外郎

晏又字明祭宜春人風度秀整主趙崇灑後灑逮繫
又自請詣獄俱以瘦死其詩見谷音集

元

趙榮字榮甫分宜人由吏學發身仕至朝請大夫萍
鄉州知州致仕子彥文以賢才徵知閩縣事

歐陽玄字原功號圭齋其先分宜坊里人祖遷潯陽
玄魁湖廣鄉貢進士及第歷官翰林學士承旨封
楚國公贈大司徒文章道德師表當世所著有圭
齋文集刻郡中

彭應雷字震卿分宜人延祐間舉儒士授南寧路判官稍遷蘭谿州同知有清白聲擢知象州以奉訓大夫安福州知州致仕

夏鎮字定遠宜春人以春秋登進士授茶陵州判官終奉訓大夫鎮學行端飭爲文章簡嚴有法度學者多宗之

袁州海牙字伯源高昌人祖爲袁州稅務大使遂爲宜春人海牙登至正甲申進士授承事卽進贛縣達魯花赤與革利害茂著廉勤節公宇新學舍爲士民仰戴善屬文

彭繼凱分宜人至正末歐普祥陷袁州繼凱募義勇起豐樂鄉迎戰大破之會安福士袁明東等亦引兵來賊退走州遂反正乃下令禁殺掠修城池繕甲兵弔死恤孤民稍賴以安行省丞相伯顏承令署繼凱本路同知時路總管寶童失守奔贛繼凱遣人迎歸反嫉之會中秋宴客伺繼凱醉刺殺之城中驚擾所集義士皆散路再陷于祥

黃盅字子中萬載人父學臨川吳激奇其篤志以子

妻之至正丁卯舉于鄉授龍泉縣學教諭徵嘗題其書堂曰大本有虞集記

夏以忠字尚之宜春人宋信王夏撫族孫號懷魯軒以春秋試大都路流寓科第二授翰林國史院編修官調國子助教遷大史院都事洪武元年明師克燕悉官其知名士以忠獨以老病辭詔許歸會遣使搜訪元史強之如江廣以忠辭不得命行至番禺卒大史金華蘇伯衡著文哀之

明

劉廸簡宜春人學邃于易詩春秋吳元年徵入京授尚賓館副使陳時務五十條及進皇王大學通旨奉詔使交趾至南寧道卒所著有尚賓集孫衢舉於鄉常州府通判揚州府同知有政聲

劉仲質字文質分宜人洪武初舉爲宜春訓導有薦仲質好學博通經史者召對稱旨授翰林編修文林郎歷官至禮部尚書十五年四月詔天下通祀孔子增修學校并書生廩膳上諭仲質曰孔子明帝王之道以教後世使君君臣臣父子子綱常

以正彝倫攸叙其功參于天地今天下郡縣廟學
竝建而報祀之禮止行京師豈非闕典卿與儒臣
共定釋奠禮儀頒之天下學校令每歲春秋仲月
通祀之是年十一月戊午設諸殿閣學士職如宋
制命仲質爲華蓋殿宋訥文淵閣吳伯宗武英殿
吳沉東閣鮑恂余詮張長年全思誠文華殿俱大
學士上親制誥文賜仲質曰朕閱宋書見尚文之
美崇儒之道廓焉且當時諸儒皆以賢德輔景運
三百有奇今特效宋制殿閣之名必期近侍有補
文竝歐蘓劉仲質才頗稱任授以華蓋殿大學士
奉議大夫爾往欽哉仲質耆儒宿學方被榮遇未
幾黜爲監察御史卒

袁天啓分宜人元季歐祥陷袁州天啓集民兵禦之
不克祥怒屠其鄉天啓匿江灣柳下獲免明初舉
儒士以病背授本縣儒學訓導卒

劉澤民字朝佐宜春人邃於經術能詞章洪武元年
以賢才舉授縉雲知縣有政聲民稱劉父陞嘉興
府同知

歐陽貞字元春分宜人從學士揭傒斯鄉進士夏鎮學工古文元季退不仕洪武初以易經魁江西鄉試授考城主簿改扶溝以老歸所著有周易問辨三十卷史提鈞七十卷餘學初集龍江叢稿東齋寓錄貧樂集自號石戶農

簡迪字居易萍鄉人洪武初以明經舉充儒學訓導庚戌春大守朱守仁以學行獨高薦陞本府教授至京試吏部召對大廷考優等除浙江道監察御史遇事敢言天顏爲霽明年以疾三乞骸致仕自

號蕲溪老人所著有傳叢類藁行于世祀鄉賢

黃子澄名湜以字行分宜人少從歐陽貞學易周與

學授尚書清江梁寅授春秋子澄初見寅令作枯

梅詩卽賦曰百千歲樹未爲枯三五箇花何太踈

聞道石門春意動不知曾有暗香無寅奇之洪武

癸亥貢入國學明年魁應天鄉試乙丑舉禮部第

一廷對賜進士第三人授翰林編修陞修撰遷春

坊講讀官侍東宮擢大常少卿命入內閣備顧問

建文帝爲太孫時坐東角門謂子澄曰諸王尊屬

擁重兵奈何對曰諸王僅有護兵纔足自守萬一
有變以六師臨之誰其能支漢七國非不強卒底
亾滅小大強弱之勢不同而順逆之理異也太孫
喜每呼子澄黃先生及卽位倚任子澄謂曰先生
無忘東角門之言子澄頓首曰不敢遂出與尚書
齊泰議削奪諸王兵權周齊湘代岷五宗王皆坐
徙進子澄太常寺卿是時文皇方奉藩于燕上書
求諸王過狀不報遂傳檄言子澄泰離間骨肉靖
難兵起耿炳文諸將相繼敗北子澄奏遣李景隆
爲大將代炳文復大敗歸詔不問子澄慟哭曰
景隆出師觀望懷二心不亟誅何以厲將士都御
史練子寧亦執景隆于朝且哭且數請誅之皆不
聽江淮諸將連敗子澄拊膺慟哭曰大事去矣誤
薦景隆萬死何贖靖難兵至淮上建文帝不得已
逐子澄且密使募兵而以竄齊黃使告燕令罷兵
不許蘇州知府姚善言子澄文武才畧顧反置散
地快敵人心胡失計至此始急召子澄未至金川
門失守子澄走蘇州欲從姚善共勤王卒就擒至

上前將釋用之抗詞不屈上命截其手足以處初
子澄舉進士與子寧實甲乙至是同處子澄年四
十四族人出江西者皆誅其子珪玉等得籍崑山
收遺骸延宗祀者皆姚善之力一子走易姓名田
經遇赦家湖廣咸寧正德辛巳進士黃表即其後
也洪熙初御史劉璉私撰誌銘又百年後提學
事邵銳建祠分宜縣萬曆四十七年知府黃
申復祖塚建墓興祀創祠府城歲祀之詳
志中

龍鐔字德剛萬載人少游鄉校穎敏不羣出入經史
兼長詩文章隸所與師友者梁寅黃子澄也年十
九選入南宮曹國李文忠司成宋訥遇以國士薦
知高皇帝召對稱旨帝器之命同貢士張宗濬等
隨春坊官分班入直講悉民間田里稼穡陳古今
孝弟文學諸史數年詔治水于泰州視軍遼東川
雲隨試輒效所經利弊當興革者悉以聞高皇帝
引對右順門嘉其能特授浙江按察司使正巳率
百司修明德教歲薦饑俸贖悉捐濟各郡尤不避

權貴以故爲朝士所忌遷長洲知縣兩浙士民遮道泣送歸侍養歲餘適晉府恭王薨世子幼上難其傅都御史袁泰刑部侍郎張思恭以鐔對起爲晉之左長史至任王禮重之委以督兵重權時西戎寇太原鐔率諸軍禦之戰于河汾有功文皇帝師起北平檄徵晉兵靖難鐔泣曰高皇帝封建諸王設置護衛所以奠安宗社今北藩日昌倉卒調兵非先帝意也固拒之文皇帝引兵至城下諭招王王曰兵權出長史司旋諭鐔曰借兵進香鐔對皇上無旨兵豈可借督軍士堅壁不出文皇力攻不克竟趨金陵入正大統飛詔械鐔下錦衣獄鐔不屈歲癸未十月九日死焉有收其遺骨得衣帶中所自血書有曰捐生固煩弗事二主別父與兄忍慟肝腑盡忠爲臣盡孝爲子二端于我歸于一所衣色形骸歸于故土年僅四十子叔馳叔驪方數齡今其遺艸及諸名公哀輓詩文猶存

黃伯奇分宜人資性純篤雅尚禮義洪武中舉才行老成授金華知府蒞政嚴謹吏服其能

嚴孟衡字衡中分宜人永樂乙未進士授山西道監察御史公形貌魁碩稟心峻潔爲御史正色立朝屢疏大臣不法百司憚其風采陞浙江按察司副使蒞任之先夕胥吏不戒于火案牘燬在事皆夤緣規避公身自引辜受罰運甓逾年有白其枉薦公者會景泰元年赦令復職時法網稍密公悉心平反至一牘中理冤濫數十人丁外艱服除屢遷至四川右布政使凡三年卒于官輿視歸舟無行李涉江風盪舛道崩巨石鎮舟石卒委棄新喻路左土人用梁踐坎猶呼爲布政石好事者銘其上有扁舟羽駛是作滿羸汴淮仗信庸蜀著清之句五子析產各止田二畝五分長子璉贈少傅叔子瑛魁丁酉鄉試先耕鄰人田赴試時猶秉鋤收芋田水里人至今傳之

劉蓋字迪誠萬載人永樂乙未進士授給事中詔巡撫湖廣表循良黜貪墨綽有風采以論事忤旨調通州判官尚書周忱贈詩官仍七品恩波重身歷三朝姓字香尋復爲給事中言愈切直謫嚴州府

經歷卒

郭彥明號恕齋以人才辟舉授湖廣黃陂丞事繼母以孝聞母愛已子而忌彥明所分產不無肥磽彥明不與之爭竟以產歸其弟弟感悟鄰有不獲贖毋鬻其妻者公聞之貸以貲克全其夫婦越數年隣夫婦踵門謝併完原貲彥明日有急不周忍人也不敢望報乎不受以子儀貴贈郡丞

易節字時中萬載人永樂乙未進士授行人歷禮部員外郎宣德間知成都府陞貴州左布政使有惠政遠人化服卒于官江西人物考云羗夷率服事治民安至孝來青蛇之異哀聲動黃鳥之羣祀名宦鄉賢

郭瑾字邦器萬載人永樂甲辰進士授刑科給事中陞都給事中獨持風裁忠謹審諤特進刑部右侍郎以論中官忤旨出知廣西潯州府未幾復原官轉本部左侍郎懇辭歸大學士楊文貞士奇贈曰六年刑部無冤獄十載黃門有諫章家居蔬水無營布袍管履人不識其爲司寇也每以買田築室

戒子孫卒年八十三始終清節一統志稱其持身端謹元愷齊科允足當之祀鄉賢

李瓊字蘊素萬載人宣德乙卯舉人仕高安縣訓導歷詹事府校書進汀州府知府剛明正大首建學校決訟如神吏無侵漁時上杭寇害躬詣撫降民安之見汀名宦志祀鄉賢

朱鑿宜春人少浮湛里中不事作業年三十二見諸生學心慕之始挾冊入鄉塾昕夕咕嚕忘倦里諺曰朱落拓三十二歲讀大學後由鄉校升國子領京闈鄉薦爲徐聞知縣純實方確有古風鄉黨稱其孝

羅紳字尚訓宜春人宣德末年貢先任四川鹽亭知縣成化年間復任廣東廉州府石康縣知縣八年流賊陷城父子三人死節奏聞立忠孝祠特祀又入名宦祠石康後廢廟祀併合浦

袁魯訓字宗道宜春人唐碧池先生之裔生而穎異有詩文名清高自守曾賦桃花馬詩見志鈐邑令大奇之景泰癸酉鄉薦登成化丙戌進士授東陽

令蒲鞭不事丁外艱服闋補蒙城縣豈弟慈祥擢
北行人司正時汪直萬安輩專橫公雅志解組適
同年羅一峯以論李賢見謫遂歎曰直道不容如
此哉乃慕五柳先生之風老和樂園植六柳以自
娛號六柳居士山居十餘年不入公門有司罕見
其面詳門人都御史張鳳傳中

袁慶祥宜春人以貢入太學待選吏部上疏言賞賜
過濫所出不償所入又論刑部尚書董方身不執
法而折辱屬官以自厲又言正本澄源宜從學校
官監親民之職宜慎簡縣令黜衰老以息貪污宜
用夏墳張元禎高明羅倫以從士望書奏詔杖之

東華門

蕭義字宜之宜春人成化辛丑進士授吏部稽勲主
事卒義操履端方問學典實文詞雅暢袁士多師
之所著有葵菴集

歐陽汶字伯魯分宜人以明經行修舉授開封府學
訓導改永康不受士贄師範嚴整進國子學錄嘗
疏論時事遷周府長史改伊府致仕家居不造城

府時論服其清介

郭紳字廷章宜春人成化乙未進士授寧海知縣侍講方孝孺縣人也事淹國禁紳至首刻方正學集創祠祀之擢監察御史巡按雲南歷陞貴州叅政福建布政使太僕寺卿至南京刑部右侍郎卒紳器宇凝重雖歷崇顯而居鄉待人不設城府寬厚簡樸有長者風子叙正德丁丑進士授刑部主事歷官雲南僉事貴州叅議

高琬字德資宜春人成化戊戌進士歷知松陽上海

二縣治行第一擢南京監察御史歷陞浙江左布政使右副都御史撫治鄖陽琬器貌端重曉達民事慎名檢守松江俗尚侈靡身爲儉約食不重肉客至魚鱸果脯一飯而已河南襄漢盜起琬同都御史彭澤討平之璽書獎勵賜白金文綺召還將大用遂謝病歸年八十有五卒初姓劉後復姓高祀鄉賢子祉中鄉試任太僕寺丞

張鳳字應時宜春人成化辛丑進士授江浦知縣歷長樂內黃皆有政聲歷陞廣西叅政奉璽書掌思

恩軍民府事時土夷爲亂至則斬其渠魁撫循其衆地方以寧轉南京大僕少卿尋陞南京都察院右僉都御史提督操江改巡撫蘇松三河盜起齊魯騷繹河運不寧進右副都御史巡撫山東兼理河道事平力陳致仕卒于家

郭鵬字時舉宜春人弱冠中鄉試第一明年入胄監沈思日進益讀莊騷秦漢以上文祭酒崔銑試之魁太學卒年二十九

龍士通字允升萬載舉人任長汀知縣長汀地饒而俗黠士通冰蘖自矢供具日止腐菜家僮三人見其清苦遂逸其二士通題一聯于署云一力自隨官舍足獨衾無愧夢魂清高御史封按閩風力嚴峻特薦士通遷彰德府同知旋卒

彭鳳分宜人剛方博洽登嘉靖乙未進士選庶吉士擢編修以名節自持冊封岷藩故事諸餽遺悉却之獨以骯髒落職居家分俸贍族割田供祀倡拓家廟定祭禮衍聖諭及藍田約乙巳邑學敬一亭侵于權貴力請改建得復原基卒之日殮具不給

直指曹公檄郡邑助之著有館稿山房等稿藏于家季子彭士兆選貢生博學好友人亦稱之

李香字汝蘭分宜人正德辛巳進士初授工部主事抽分徐州值歲荒捐俸賑窮瘞死轉刑部郎尋擢廣左兵憲綏靖蠻寇朝廷褒之補任山西受命勘邊深入撫勦歷陞四川巡撫都御史大理正鄉引疾致仕歸香清恬端莊宦轍所經靡不服其公廉家居敦尚孝友捐索贍族親修學宮卒祀鄉賢祠長子李慶余亦篤孝友時權門奪其父產不從遭

陷繫獄吟詠自如後事白復學應貢高尚不仕

易鸞字鳴和幼聰穎五歲能詩正德十五年奉文建黃太常忠臣祠鸞自呈願以已地豎祠助修登嘉靖癸未進士授和州知州下車手較權量使民畫一時有易公秤斗之號政善民安修和州志皆出公自撰陞刑部郎奉差審錄三十八歲卒子弘器中嘉靖丙午鄉試第一家居清澹博古善文未仕卒

何爾字邦美宜春人嘉靖己丑進士授舒城令持廉

秉公吏民畏服擢兵部主事改河南道御史巡按
蘇松一意激揚微行出訪遇舟子爲地方厲甚竟
治之三吳大吏憚其丰采入掌計典公平不阿林
居十載執政復以書起辭曰吾守吾舊不能降心
以從人也每郡中有大利病侃侃陳說人德之
楊以誠字明夫宜春人嘉靖戊戌進士授行人奉使
岷藩擢廣東道御史巡陝西茶馬嚴絕吏弊復巡
按廣東約浮費簡將士彈劾不職贓吏望風解者
十餘人兩監棘圍搜剔積蠹以遭謫歸里行李蕭
然人服其清

楊以正字吉夫宜春舉人博學工古文辭居母喪不
就內榻者三年性剛介寡諧晚號大仰山人尤砥
礪名節雖屢困吟誦自如不仕卒郡守劉公錄其
行爲文哀之所著仰山彙藏于家

朱任字子重宜春人爲人高潔疏宕嘗自矢以聖賢
可師侍父疾三月不解衣及舉明經司訓進賢身
率諸士厲廉恥未幾致仕諸生白督學固留至欲
立碑志思焉生平不治貲蕭然懸磬人以重金請

輒却之徃徃以詩文見志云

宋良佐字守忠萬載人嘉靖乙丑進士授淮安推官
清修有爲擢兵科歷陞戶科都給事美秀而文時
瑣闥有宋黃門之稱彈壓不避權貴如正中宮通
海運肅閣監停翫作載大政記中陞太常少卿大
理右少卿謝病歸癸酉秋卒四壁蕭然鄉評推重
宋希堯字叔中分宜人性宕蕩和易下筆如注萬曆
丁丑進士二甲三名時江陵不丁母憂鄒元標以
進士特疏叅劾希堯亦侃侃對其子言不平以故
溪啣之故事當讀書中秘或授禮曹竟不得止授
刑部未幾稱病卧鈐岡越歲出補工部繕司管京
倉竹頭木屑必親以過瘁得疾卒祀鄉賢鄒元標
有墓銘

簡繼芳號慶源萍鄉人負資異敏年十三與童子試
邑令楊自治見而奇之稱爲崑山片玉遂補諸生
家貧篤學舉隆慶丁卯鄉試萬曆丁丑進士歷官
雲南副使所至稱廉謹以老告歸著學葛堂集詩
文十卷鄒元標序

陳巽言字汝說宜春舉人教諭宜興轉上杭知縣清
救端重不阿當路續轉維摩知州告養生平孝友
廉靜寡慾學以性命爲宗布衣蔬食恬如也著有
陽明先生摘要一卷

張璧字世良萬載人萬曆癸未進士授南京兵部職
方司主事歷員外卽遷武庫司卽中值營兵缺餉
脫巾諫呼公單騎擒首亂卒以鎮定遷廣西按察
司僉事巡左江却關門例數千金興學校課諸生
定交南黎莫二氏構殺之亂轉右江叅議忤直指
使改雲南叅議分守金滄條議罷大理採石省麗
江額解金歲革樣金四十八兩值歲饑斗米錢三
百臺司議以米代杖每就禁多斃公歎曰吾寧違
新法以一官易多命下令悉除之全活三百餘人
士民德之嗣謝病歸尋陞本省副使當道累檄不
起卒于家其伯父賢仕有罪公嘗破產贖之疾病
者無親踈爲醫藥困乏者給之喜讀南華好鍾王
法帖尤愛蘭亭及卽世遂以殉著連山集行世祀
雲南名宦子汝梅仕定州同知

趙濂分宜人父錦安貧嗜學嫻于詩賦著有草堂集
行世濂幼習庭訓聰穎絕倫弱冠選貢授石埭令
累遷惠州郡丞所至有惠政事親以孝聞撫姪如
子處族里昆弟恤孤賑貧好引進後學邑人稱爲
東谷先生年九十五卒所著有丙餘錄歸田藁寄
適集等卷藏于家子伯冠工古文詩詞以貢官大
理推有治行稍遷養利守卒所著有行寓錄滇中
藁等書

羅葵號性菴萍鄉人少游邑庠父喪廬墓三年註孝
經萬曆初詣京上書給賜深衣大帶許以布衣游
行郡縣講學後與鄒南臯劉瀘瀟諸先生闡明理
學江右皆仰宗焉年七十餘終

彭士遠字利見分宜人癸酉舉人初授廣西賓州知
州移河池州州素患土孽公至恩威並著廉得其
渠魁地方寧謐州素不知學公拔子弟之秀者親
督課開廩餼士頌其作人尋遷鳳陽同知以河功
加俸資捧卒于京居家恂恂雅飭嘗分俸置義田
以贍族人

彭自新字滌之萬載人萬曆壬辰進士授行人陞刑部郎中任九載出守四川重慶府時楊酋初定公爲善後陞本省副使丁內外艱服除補川南道歷陞雲南叅政分守金滄時雲龍逆酋段進忠謀襲奪官擁兵叛公計誘擒勦熾渠散脅雲永遂得安枕迤西以平撫按交章薦美遷本省按察使以疾致仕歸天啓癸亥卒初爲大行卽抗疏請元子冠婚大典一時重其丰采仕滇有戡亂功見滇南政蹟

朱志字元遠宜春人少負才名性孝友以貢選入大學舉順天辛卯鄉試仕瀏陽令有侃侃節子壻來省一飯卽令歸曰母擾吾百姓甫三月以不阿鑿瑞爭民命棄官歸絕無私謁關利病者輒爲有司告與修郡乘多所維挽子六人俱以文學顯光裕光祺先後鄉薦克承其志光祺字賚賢端謹嚴重讀書淹洽遭郡多故祺條議戰守激揚忠義上書潯督語極憤切後教授萬山中曰靖節仁山吾師也爲詩歌多沉痛疾革語諸子曰吾今得爲完人

矣正襟卒

宋九儀字夔卿萬載人九齡出應童子試三試皆第一十二食餼二十六恩選部試授建寧知縣尚文學課農桑禁女巫戒溺女廣倉儲歲凶捐俸積穀邑人曰宋公倉士民愛慕爲立生祠九儀取其木主以歸曰吾不務虛名也入覲還力請終養事親以孝聞林居三十餘年僅郭田三畝惟吟詠自娛有和淵明六詠以見志年八十一終晚號環堵子著環堵漫言

袁軾字欽禮宜春人年十四失父下帷力學補博士弟子試輒高等入闈不過毅然曰泉石可甘藪笋可嗜而奚區區爲惟日課子以程朱之學且曰遇則匡時不遇則抱策季子業泗成進士歷宦有聲亦不色怡曰兒輩自了事耳求田問舍絕口不言日與里中講鄉約訓民行學者稱爲東泉先生年七十有二子五人著名者三以業泗累贈漳州府知府

嚴堯日號用汲分宜人選貢舉庚子順天鄉試讀書

淹貫詩文力追古大家善真艸署泰和學博闔郡
士俱來學吉水劉同升臨川陳際泰皆與焉大司
馬郭公子章稱曰建學以來未有如先生者也文
水鄒公元標倡會講學公究晰性理鄒推服乙卯
分校蜀試壬戌鄒起總憲招爲幕屬公辭復署汾
西卒公見義慷慨如關分邑學門廛舍署泰和築
壩建浮圖署汾西則建魁樓皆極力擔荷居家孝
友所著有白華館藁西昌襍艸孫一晁順治辛卯
鄉薦

袁業泗宜春人字時道別號景源萬曆戊戌進士知
樂清縣改蘭谿丁父憂再補龍溪所至著循績擢
南京兵部職方主事進武庫員外郎中特疏請撤
湖口稅璫李道遂罷其權江上下千里稱便知漳
州府漳故多盜公梳櫛綢繆俾無震擾士民親附
乙卯歲饑公發倉賑之又勸民出粟分遣諸吏乞
糴潮陽諸鄰郡以濟不給治糜置藥安集拯救無
遺力全活數千人後以入覲行漳民繪圖祀公一
時稱盛事丙辰陞福建屯鹽道副使公爲人端亮

有介節高行念母太恭人年八十餘乞養家居天
啓中闕黨魏忠賢等亂政公堅卧不出崇禎改元
召補廣西副使分守左江其俗多不知學公誘以
文教士類興起遷廣東叅政分守嶺東與分巡謝
璉平九連山賊地介惠潮兩郡多反側肇置連平
州所部以寧遷浙江按察使未至以功賜白金文
綺徵爲南京鴻臚寺卿加一秩公將赴浙時會廣
寇劉香等蠶起震濱海諸縣督府留公決策議者
請撫公不可曰國家全盛蠶爾鼠子憑山海陸梁
義當滅此朝食議撫是長盜也且賊性觀望叵測
聽之始矣督撫猶豫不能用公遂謝去代公者果
以輕撫墮賊計死乃合兵勦平悉如公言是時有
識者爭倚重公公在鴻臚二年歎曰卿曹雖可卧
治奈何老不知止哉再疏乞骸骨歸崇禎甲申三
月聞京師陷痛憤成疾八月終于家享年八十一
而乞養家居者十有三年予告者十年杜門屏跡
不齒利祿篋無長物自守令至藩臬分司多在閩
粵間山甌海澨威著惠行閩粵五嶺之民皆曰是

于我大有造其守漳時黃石齋道周爲諸生公獨
早識之卒爲名臣嘗修郡志辨袁州糧額誤編狀
請紓民困後議汰浮糧卽引爲依據表黃太常子
澄遺事具載于書他如周族黨建義倉治橋梁凡
有裨于郡者輒身先之不以私干公府文詞詳贍
樸茂著有訓蒙編燕游艸兩朝奏議秀橋歸來集
若干卷子繼樟繼梓皆賢樟貢士早卒繼梓康熙
甲辰進士

吳三益號受玄萍鄉人萬曆甲辰舉進士授大理評
事陞右寺正出守邵武尋改徽州府丞所至以敏
練著聲晚年林居與修郡乘子應庭中書舍人孫
兆麟貢士

張承詔號篤斐分宜人萬曆己未進士授蘇州推官
廉明風厲吏民畏服遷禮部主事崇禎戊辰擢戶
科歷工科都給事中果決敢言如關三朝要典劾
諸閣臣風裁謬具載崇信錄中庚午主考山東
所錄多名士陞太常少卿南太常卿通政使刑部
左右侍郎戊寅署尚書以會審事忤旨閑住識者

惜之子士元字伯起孝友溫和丁內外艱尚壯年
以哀悼鬚髮盡白順治丁亥歲大稔餓殍載塗元
煑粥以賑全活者衆孫祖德亦舉鄉試
彭大科號媿各分宜人萬曆丁酉舉人初知漢川縣
縣有河名劉家牖者巨鎮也商賈絡繹歲額派商
稅八百金協濟潞府以縣丞駐牖地徵收率以爲
常癸丑河閘舟楫不通而稅仍歲徵牖民苦之公
至與邑紳周公嘉謨議請之當事列疏入告得允
所請裁冗員罷牖稅贖聲蔚起撫按交薦調知廬
江有惠政陞北城兵馬時權璫魏忠賢用事公獨
守正不阿左遷景東同知會璫敗擢工部營繕主
事監督陵工官錢無所私以勞瘁請告清標卓行
士民稱之

嚴雲京號志印分宜人生平謹厚爲文根據理要尤
長于易萬曆乙卯舉鄉薦崇禎辛未授太湖縣諭
丙子知平原修城繕器除弊救荒民德之戊寅以
城守著績陞兵馬指揮御史楊公仁愿給事中陰
公潤俱疏薦壬午召對授御史屢有條奏薦黃公

道周楊公廷麟姜公曰廣劉公同升等尤稱侃侃
巡按河南兼監軍時汴圍越月公疾趨受事促諸
鎮左良玉劉澤清許定國等進兵援汴圍稍解未
幾賊復合公激勵諸鎮熾賊報效而諸鎮竟鼓譟
引去值霖雨彌月平地成川賊決河灌城城沒而
汴圍獲解公集舟數百編筏冒大浸營救宗藩吏
民等會上別遣監軍代公乃歸杜門却掃惟地方
利害慨然引陳祀鄉賢

袁一鳳號鳴岐宜春人萬曆己未進士器宇修偉操

履質實初工部主事陞虞衡員外郎中曉暢吏事
善治繁劇逆璫廉其能有意鈎致之公持不爲動
守西安清介自持不妄取一錢未幾遷副浙憲時
海塘崩潰奉旨修築估費十五萬金公身任其役
用四萬金而工成浙人德之歷楚藩臬久之以塘
功加右布政使癸酉卒於官

鍾爝字叔憲號昭明分宜人天啓壬戌進士授中書
考選戶科歷禮科都給事中縝密不妄言嘗以袁
賦浮重又遼餉加派煩多約諸紳在朝者跪請豁

臧卒以部議格未盡行識者恨焉庚午主試湖廣
一時稱得人陞太常太理少卿順天府尹太理正
卿吏工二部左右侍郎左都御史公體貌魁梧器
識沉練時謂公且大用以會審事秉筆忤旨革職
回籍林居十餘年罕談時事庚寅卒

黃希憲原名金貴字雙南分宜人天啓乙丑進士知
順德縣擢御史兩淮巡鹽時中貴用事額課不足
特疏更綱鹺政一新巡按甘肅約浮費飭將吏禦
變有方畧遷大僕少卿應天巡撫三吳漕白二糧

民苦已久公至力爲請命海寇王尚忠蹂躪崇明
各村落公熾渠散脅吳松悉平自是恩威並著晉
秩河道總督兼兵工二部侍郎崇禎末公疏薦宣
城應聘建言諸生沈壽民學行可大用爲部議所
格不報又嘗議特祠黃公子澄公性剛氣豪見義
勇爲乙酉僮姦黨用事陪京誣公河工冒餉下詔
獄會喪亂出亡卒于紹興大用未究士民哀之

袁繼咸字季通號臨侯宜春人少砥志節登天啓乙
丑進士授行人奉使致祭壽陽王禮成以王所遺

名馬贈却弗受崇禎庚午拜御史疏請辯君子小人進退之介甫兩月條奏盈篋爲仇者誣訐謫南行人司司副遷禮部主事時中官王坤以監視貪悍而張燹憲總理戶工事怙勢凌轢諸卽吏率望風蒲伏公屢疏痛言上頗采用癸酉典粵東試遷山西提學慎所簡拔巡撫吳姓疏薦其治行以忤巡按御史張孫振被誣逮問晉諸生伏闕訟寃都御史白其事逮孫振公得復原官分守武昌改淮揚道尤多擿伏性偏強與督鹽中貴楊顯名抗禮顯名佯薦其才請加敕兼視鹽事實抑公受制也公倔強不問如故遂坐免流賊張獻忠寇湖廣督師楊嗣昌檄公監軍禦之累陞僉都御史撫治鄖陽數困賊辛巳二月賊襲陷襄陽而公實分治鄖軍爲部議所摺復被逮繫論戊午薦起總理河北屯田初總兵官左良玉軍襄陽襄郢連敗引蹏安池間轉餉不繼兵寢爲暴上下數百里江帆中斷公徑趨小孤致書良玉責以大義復告都御史李邦華爲言九江道府移川黔餉十餘萬餉之左

兵自是不暴掠然不肯一戰上特命閣部吳甦出
視師始議設督府九江扼吳楚吭于是以公總督
諸軍事公聞獻賊圍武昌疾馳趨左師西援見浮
屍蔽江公指謂良玉曰大將軍忍見此乎左面赤
然難其行公讓之曰大將軍功多罪亦不少朝廷
不督過之一歲兩遣中使宣諭開國徐中山所未
有也奈何不圖報稱良玉左右以他辭爲解公叱
曰人孰無死張睢陽死賀蘭進明亦死某行矣寧
爲睢陽死不爲賀蘭生左大慚始進師先以五千
人往公捐金犒兵授計屢敗賊取復蘄州大治
昌諸州縣賊棄武昌走岳州無何吳甦中讒罷公
復改屯田會新督呂大器與良玉有郤聞于朝復
移公督九江軍良玉挈兵還楚弘光立進封良玉
寧南侯氣益盛公之再爲總督也雖以夙望見推
兵事多撓掣不盡由已出乙酉四月賊益東逼時
南京用事者亂政良玉指清君側劫諸將盟欲南
下公集諸將城樓灑泣曰兵諫非正晉陽之甲春
秋所惡可同亂乎肅冠帶誓死未幾兵將洶洶卽

良玉亦不能制夜入亂九江良玉見火起拊膺曰
吾負江督吾負江督遂嘔血死是時 大清兵將
定金陵 英王師壓九江矣良玉子夢庚以軍降
挾公俱北公再四求死不得八月抵京數奉

諭旨令遵制易服以朝公辭不從自寒徂暑坐一室
讀易春秋史鑑及謝臯羽諸集作經觀史觀二書
未就丙戌六月二十四日復 諭令就官不然且

死公曰不殺固 清朝之仁效死實明臣之義越
二日赴死于城東便門里許三忠祠南臨刑色不
變初公被拘舟中賦詩見志有曰衰年奉二老一
死酬至尊從容文山節誰招燕市魂詩文及奏議
多散軼不傳

袁一鰲字占梅宜春人萬曆己酉舉人授江山知縣
調邵陽入爲南大理評事陞刑部主事員外郎審
決河南擢寶慶守吏民憚服喜獎拔士類以忤岷
藩解綬乙酉秋卒

張兆觀號雲階分宜人溫厚嫻文辭三中副車舉明
經通判邵武府鎮靜有政蹟擢守黔開州首建學

校苗民始知書厭兵革而州以寧開人于學旁立
祠尸祝焉尋以補官道卒

何山字叔子宜春人幼穎悟文特縱放督學雲怡蔡
公廣成侯公屢拔第一崇禎己卯魁鄉試庚辰會
牘餘姚孫公嘉績首薦主試薛公弗錄識者歎焉
朱允恭字君培分宜人舉萬曆戊午鄉試授望江知
縣臺司交薦時淮海彫殘公以循良高等遷守海
州焦勞拮据地方稍有起色會忤當事去任終歷
成都新津所至慈惠著聲公早失父而貧事母孝
弟方五齡公撫育至老不衰凡所入不以自私丁
亥奇荒公日不能再粥猶簡敝衣鬻于市以周親
族之貧者癸巳冬卒

劉映洙字崑懸宜春人少浮湛諸生間氣豪宕崇禎
壬午舉春秋鄉試第一後棄家祝髮誅茅瀏醴溪
山不復出尋卒

張兆蘭字以綺分宜人性豪逸強記能文崇禎己卯
督學廣成侯公拔第一辛巳選貢壬午廷試唱名
禮部諸生皆跼伏兆蘭獨長揖宗伯奇之入大學

鄉試報罷歸癸未冬憤獻賦陷袁僞署官屬糾衆謀殺僞知縣龍方捷恢復邑城事覺爲所執殺之萬年橋上始終無屈詞士林悲之

袁繼樟字樞若宜春人大鴻臚景源公長子少靖重不苟爲文沉厚能詩癸未拔貢嘗游金陵維揚恣意山水間多所憑吊歸而學益進郡司理王公延禔器重之每與周諮地方利弊如清四差革幫解禁里甲充夫馬經收佐益爲多癸巳疾篤惟以未得終母養齋志爲恨云

張問明字日章分宜人幼失怙恃弱冠方就學勵志節丙寅以恩例明經任大名府魏縣值寇殘隣邑鈔掠城下單騎撫諭去以治河著功時督府盧公嘉其能署叅永平軍戊寅巳卯間大水丁亥竒荒煮粥施米全活甚衆司理王公延禔爲題其廬曰德門遺老云

國朝

陳之龍號去亢宜春人登天啓辛酉鄉試爲人明敏英達有文武才初任常德司理風采卓然歷守乾

州同知西安銳意當世聲望大著遂監賀軍治兵
 關內順治乙酉擢授巡撫廬鳳淮揚等處地方都
 察院右僉都御史公至加意拊循威惠並訖後以
 疾歸鍵戶著述課子數留意地方如汰浮糧輯郡
 志等事尤卓卓云庚子卒所著有甓湖小草偶吟
 諸集今祀鄉賢

袁州府志卷之十一

人物

夫志核人物者廣矣遺逸者宜隱淪也孝行者首
 善也貞烈者昭訓也若夫貴毓坤儀壽徵人瑞載
 在前史秉靈應秀尤有徵焉是所宜志也

隱逸

漢

袁京宜春人少無進取志隱居縣城東北五里山是時

宜春為縣後人因其姓以名山豫章太守為京立
袁未各郡

高士坊

唐

彭構雲宜春人少通陰陽圖緯之學不求聞達于時
玄宗詔徵之至再始赴闕拜官不受竟辭歸孫伉

貞元間進士別有傳

宋志作彭雲避思陵
廟諱今仍作構雲

彭蟾字東瞻宜春人好學不仕以處士稱重修唐韻
及著鳳池本艸廟堂龜鑑共一百二十卷有詩十
一首見宜春集

劉松字稽美宜春人昭宗時累舉不第集郡人所爲

歌詩斷自天寶以後得四百七十篇爲宜陽集六
卷見唐藝文志松有詩十首

蕭蕪強宜春人隱居十五年不出庭戶刺史董禎欲
表聞蕪強固辭乃建逍遙坊于其里

宋

傅公謀宜春人善文章嘗作小詞曰草草三間屋愛
竹旋添栽碧紗窻戶眼前都是翠雲堆一月山翁
高卧踏雪水村清冷木落遠山開唯有平安竹留
得伴寒梅家童開門看有誰來客來一笑清話煮

茗更傳栢有酒只愁無客有客又愁無酒酒熟且
徘徊明日人間事天自有安排其詞清雅曠達抗
世離塵可想見其人又與分宜令許及之詩并無
遮榜語皆調笑可誦集不傳于世

李服分宜人父游刺史封宜春侯服治易詩書教授
弟子累徵不應詔錫以粟帛賜號三經處士

孫適宜春人元豐間貢爲上舍後因伏闕言事罷行
三舍法黜上書易不等適遂拂衣歸教授于家終
其身

邾元鼎字寶之宜春人受學鄉先生鄭銓精于經傳
博學洽聞未中第教授鄉郡卒無子其門人宦達
者猶歲時上其塚

劉長者一名崇禮字掃之萬載人人以長者稱之相
傳宋制置使允迪公子廬墓謝山劔讀書堂曾受
學朱晦菴與楊誠齋友分宜令謝諤亦有贈詩今
龍河吹藜與南昌之梓溪皆其後也一名昇暘字
迎曦屢試不第取易筮之得蹇因號蹇齋世居燿
築近謝山建讀書堂于其巔不求聞達倡明理學

楊謝二公題詩贈之今萬載之煙築新昌之天寶
臨江之清泉南昌之梓溪皆其合派未知孰是接志
稱讀書堂爲長者劉宋今觀楊謝二詩一云喜聞
劉公志幽獨一云聖門一到功相先信是理學一
流而老盧爭駕擢桂廣寒則期以仕進牙籤萬軸
鄴侯三萬等句又推以文章竟不知劉宋爲何許
人仍以長者立名
列之隱逸以俟攷

元

盧湜萬載人性度曠曠行詎雅飭能文章所著有海
槎空語或謂湜樂府諸作可擬唐王建張籍

明

劉貞字文忠號靜齋相傳漢劉向後自咸陽徙居萬
載故名其地曰吹藜已遷邑北之龍河祖父世有
隱德公生而英敏少孤其母坐之膝授以孝經輒
成誦壯博聞強記嘗于居西闕一軒曰靜樂士大
夫多歌詠其美學士魯公蔡爲之序晚年積書訓
子名所居之室曰桐岡書屋祭酒胡公儼爲紀其
勝少傳楊公士奇又歌詠之公孝友慈惠出于天
性子蓋中永樂進士家傳劉氏餘芳集

吳公儼萍鄉人隱居高尚結廬面山寄情歌詠撫教

諸孫有無疾還須加內省策勲好趣桂花秋之句
常焚券濟貧還金恤媪以陰德昌其族壽九十孫
三畏三益登科貢

黃灝號應川分宜人生而穎異工詩文好義喜施里
中有不平嘗求質其成晚怡情柳菊結廬陽橋之
東號柳東居士

林發森萍鄉人慈惠貞介雅志丘壑每以吟詠寄懷
萬曆戊子歲萍罹竒荒燔燼載道捐所積粟賑之
多所全活年九十終鄉號後江善人

孝行

唐

廖洪萬載人大中元年父母繼歿捧土爲墳結草廬
傍號慟無時髮未嘗櫛有青蛇如龍長不逾尺止
其側風雨失其所在又有白獸相繼至鄉閭異之
咸通中縣令朱郁以狀聞敕孝行感應令本道特
加旌表

宋

易延慶字餘慶宜春人幼聰慧長慈順以德行稱宋

乾德中以父喪廬墓墓西北產紫芝一本後又產玉芝十八莖萌萼扶踈好事者繪爲圖翰林徐鉉諫議薛映作詩頌以揚孝感未幾有詔採天下忠孝之士延慶與選以母疾不起宋太宗朝擢大理寺丞以葬母去官母平生嗜栗乃植二栗于墓前樹長而連理蘇易簡朱台符贊述褒美時稱爲純孝先生

元

郭擦萬載人左手及兩足掌皆反止右手擦地行人因名母老及弟皆病廢乞于市以養母者十八年至正二年遇道人手藥五丸授擦隨服而愈既以藥遺母亦愈鄰富人有病者求其丸愈遂廩擦母子終其身

明

易直字子順宜春人少讀小學躬行家禮父廷選性嚴諸子少違直輒跪伏終日父疾一再嘗穢嘗遇寇抱母哀慟賊舍之治喪不用浮屠奉父母合葬廬墓三年服闋例應貢直傷伯仲早世祠墓無所

主上書求解諸生籍學使者許之遂讀書賜崖山
嘉靖初有司舉行義詔旌直孝行之門卒之日具
常服祭祖考謝族隣作引咎詩辭世囑母以旌表
孝子書銘旌著有詩文家禮便行藏于家

李魁春萍鄉人性孝友生母易氏逝廬墓山中哀毀
骨立地無水鑽石得泉遇虎虎輒引去繼母及父
喪廬墓俱如前邑令秦吉聞之微行至廬終日歛
歔不忍去毛尚書伯溫彭編修鳳等俱爲頌之

龍人俊字廷卿萬載人以貢任南平訓導爲人介直
嘉靖辛卯冬巨寇黃牯眼入其家母老病卧俊擊
殺二賊首人服其孝勇

龍以仁萬載人周歲母喪少長每慟哀思假母圖像
奉以朝夕築舍車溪上追服廬墓者九年致感自
雞號犬之應崇祀春秋一遵文公家禮刻有瞻恩
堂集當道累旌其門

李茂林萍鄉人事親至孝萬曆間父心痛疾篤林憂
惶不知所出禱于神割股作湯以進父愈巡按顧
題旌每年給銀米如例性好施至老不倦授四川

威州判未任卒

張經萬載庠生父廩生名列文以崇禎癸未歲賊破城獲文強之入山文不屈遇害經見父死大罵賊亦死之

國朝

楊嘉禎宜春人郡庠生順治丙戌春兵亂父文盛避兵山堂兵將至禎從間道渡水報父水急被溺流至深處猶躍出水面曰速走速走隨溺死父悲痛不勝端陽日哭之以詩曰浪連當年學院劉浮沉樽酒日悠悠况逢歡笑天中節更接慇懃地主酬老大劇愁添老病風塵閒想郢風流延陵三號悲何限漫怪西河卜子憂

李宗聖分宜縣廩生事繼母黃氏承歡無缺母亦以慈聞及父卒母托以終身焉母病衣不解帶四十餘日焚香籲天請以身代居喪哀毀異常聞者亦爲泣下順治壬辰邑令江載清以事聞巡按張公嘉旌其閭年五十偶游田間歸呼童具沸泉就浣浣畢更衣危坐而逝時值仲冬雷電交作人謂孝

行之感云

貴后

宋孝宗成恭夏皇后宜春人曾祖令吉吉水簿父協后生有異光穿室及長選入宮侍懿聖太后閣中懿聖宋高宗皇后吳氏也孝宗爲王時夫人郭氏薨太后以后賜之卽位進賢妃踰年立爲皇后乾道二年命謁家廟宗族親屬推恩者十一人三年崩册謚安恭皇后攢會稽園陵慶元改謚成恭后初入宮協居益困歸旅蟠龍僧舍卒以后貴追封

信王

見宋史后妃傳

壽母

明黃氏配袁軾邑廩生以季子業泗累贈中憲大夫母封太恭人六七歲時母嘉之曰是兒端凝異日必清貴長適袁寡言笑貞淑莊嚴有程母風甫一年翁逝奉姑二十餘載温省色養日暮勤渠人稱孝婦產五子科甲者三業泗成進士守漳州秩滿民遮道呼留陞福建屯鹽道副使念母太恭人年八十告終養日竢母百歲後方出同兄濂常扶太

恭人至庭前花果下萊舞爲歡母年百歲人共羨之郡縣以聞詔建坊額曰清朝人瑞侄孫繼咸刻有人瑞集

烈女

明孫氏女宜春人初受里人陽遵哲聘遵哲當戍遼東父議別擇所歸女聞哲行自縊死

常氏女名秀蘭萬載人九歲父體軋沒隨母再適李姓鄉賊攻李舍時女年十七賊欲污之女拒罵不絕口賊勢益迫女愈忿詈賊怒手刃支解之

孫氏女分宜人初許聘里人歐陽翥洪武間翥以仲兄翼卒于遼陽戍所當往補戍女父議更擇婿女聞繯死後園竹間且曰及吾夫未去使知吾無異志也

節婦

元陳氏萬載龍均用妻至元三年兵亂被擄潔身勿

死

舊志未載按邑令王國用贈詩有云天子勵風化亭碑千古勒珍重翰苑公爲婦載芳潔則當年實已蒙旌而子孫不能出家乘入誌幾至泯沒則其他苦節幽寒齋志以終者何限也

鄧氏萬載甘希魯妻希魯死氏年二十遺腹一子名

德冲家貧織紉矢志撫孤

明烈婦袁氏分宜陳九淵妻元季兵亂有王萬戶者
聞婦美姿容殺九淵欲奪之婦曰夫爲我死我何
以生自縊死

敖氏萬載張鼎寶妻元末舅姑及夫俱斃于紅巾賊
婦年二十餘無子守節靡他以夫姪安保爲嗣洪
武二十三年旌其門

張氏萍鄉人李奇山妻年十八歸山二十三山歿堅
貞不二洪武中旌表

按古志
作何氏

周氏宜春人蔚州同知楊伯憲妻年二十四伯憲卒
于官周護其喪歸塋遺腹子一人名汝濟周撫之
成立養其姑二十餘年孝敬如一日正統初旌表
其門

張氏宜春人監生易相妻相卒張年二十七無嗣守
節四十餘年

鄧氏安福人父秀湖廣僉事年十九歸分宜歐陽鳳
鳳歿無嗣守節自誓弘治年旌表

蕭氏宜春人府學生劉顯妻年二十五顯死守節不

嫁撫二孤賴以成弘治開旌其門

張氏萬載周大甫妻年二十一夫亡無子以夫從子元龍爲嗣有富民欲奪其志者婦以死誓嘉靖開事聞旌其門口貞節詳縣志

歐陽氏宜春彭秋妻秋死時年二十六無子姑欲奪之以死自誓守節四十年嘉靖二十八年旌表

李氏宜春人府學生何春妻春亡李年二十三遺腹生子俊李誓不他適撫孤俊以立

彭氏宜春郭霽妻年二十六霽亡遺孤二家貧誓節不奪者五十餘年孫太僕寺丞進以其事聞詔旌之

歐陽氏宜春易恬妻二十八歲恬亡撫孤不奪夫姑兩喪苦心營葬春秋抱墓痛哭萬曆五年旌表

周氏分宜學生李慶鍾妻年二十餘夫亡無嗣父黨欲議他適誓死不移按院旌表其節

蘇氏宜春廩生朱鍊妻年二十餘鍊死無嗣以貧甚遺命別嫁輒就死尋寤逾甚鍊兄弟皆貧莫能供欲強如鍊命蘇益憤欲投水火乃止寡居十年餘

有部郎聞欲娶之妯娌謂此富貴叢中耳蘇歎曰
吾無庸生奚庸富貴吾能舍彼兩髦哉家無餅粟
親無強近居孀五十年十指供口年七十五卒
趙氏分宜諸生袁應藿妻藿亾無嗣趙年甫二十其
貧茹苦六十餘年萬曆中旌表

黃氏分宜諸生袁應槐妻子趙娣姒也年二十一寡
無嗣坐卧一室雖戚屬罕窺其面萬曆中旌表

侍氏宜春孝廉楊以正繼室江南人年十四歸楊三
十二以正卒守節自誓子緘宦京師卒于任復扶
視歸年七十八卒按院屢旌其節

鄒氏增生袁繼弘妻宜春人年十四歸弘十六舉子
方歲餘弘以應省試弗第發憤下帷得病甚鄒夜
以身禱願代死藥餌必親及卒自盡者三祖母黃
抱孫泣曰翁姑年逝從夫死誰爲養老鞠孤者鄒
強起勵志時年方十八子六歲多疾有富人某欲
奪其志鄒引刀誓死姑力救乃免後祖母與翁繼
殞鄒盡力舉喪獨養姑龍氏九年乃歿子一卿補
邑弟子員遂供佛齋食戊寅寢疾將篤強起櫛髮

易衣卒甲戊彙題建坊

趙氏分宜人增生贈御史黃夢龍妻性靜淑善事舅
姑年三十夫逝家貧勵志守節訓子希憲成進士
歷官總河少司空母封太孺人年八十人無間言
同時一門中潘氏爲黃夢麟妻鍾氏爲黃夢豹妻
悉青年守志三節同堂希憲曾疏請于朝旌表如
制

袁氏萬載諸生鍾伯良妻年十八歸伯良僅逾年良
卒氏欲以身殉方娠未果復強起至期生子美無
何翁欲奪其志使伯仲氏得據肥產氏以死誓未
幾伯仲氏亦相繼卒妯娌皆改適而氏剪髮毀容
持之毅然惟拮据撫孤以佐舅姑美後舉明經知
縣畢懋良以聞詔旌表建坊牟村市

雙氏萬載張粲繼室貴州雙堅之女年十八粲赴知
江州任娶焉生男以宗粲致政歸尋卒氏躡踊泣
血殯葬皆獨任有富民某謀奪其志氏噴目裂眦
引刀刺四字于臂曰誓以死守族屬疑有貲移他
侵屈之賊拘以宗繫獄氏悉變產以脫子母子零

丁日窘工織維訓子以宗遂舉鄉試孫亦補諸生
氏恬如也詔旌其門

簡氏萍鄉廩生譚堯化之妻副憲繼芳之女孝事翁
姑早年夫亾子幼經歷患難冰玉自持子貢生譚
錫命廩生銓

涂氏萬載廩生譚瑩妻年二十五夫歿無子守節至
六十有六院道表其門

袁氏萬載龍應時妻年二十三夫亾哀毀垂絕者屢
舅姑慰之強起字孤聞母謀奪其志卽引刀剪髮

斷指曰吾髮可續則可嫁指再生則再適悉以奩
具置公田不私其有家衆百口感而同爨孤德正
德中並補諸生刻有懷慈錄

韓氏萬載諸生楊嘉賓妻年二十二孀居孝以事姑
菲食敝衣以教其子子菁庠生蒸貢生年八十終
今苦節未旌

王氏萍鄉監生吳應殿之妻少年貞守歷難不渝子
庠生兆瓚

甘氏萬載廩生辛子美妻年十六歸辛夫卒氏每哭

氣絕姑諭之稍節哀聲貫營殮殯紡績事姑非女
流不出見日奠食晨哭昏止不夜號居孀四十年
郡守季德甫行縣訪賑之
汪氏萬載貢生周德昌母年二十五孀居紡績訓子
年近九十終

丁氏萬載鄧樾妻夫卒事姑訓子矢志不二子文輝
補諸生年八十六終

辛氏萬載諸生郭弘敷妻夫卒紡績撫孤彤聲不出
閨門後幼子及孫正坤正圻皆補諸生年八十有

五

徐氏萬載諸生彭煥妻夫卒子甫四歲貧無爲生勤
女紅以養舅姑有勸改適者卽悲泣終日子生員
希孔

陳氏名戌貞萍鄉王本遂之妻年二十七守節存孤
至八十終孫貢生王政光

彭氏藩掾楊嘉寶妻萬載人年二十二寡子亦卒撫
侄初東爲嗣斷髮永矢年八十四終

葉氏萬載生員彭信古妻年二十三寡日夜抱孤士

瑾泣曰吾所不獲從地下者以此子子既長篝燈
授書紡績佐讀每值翁姑與夫忌辰必哭失聲後
學博袁舉節婦詞曰茹荼心緒銀缸照影底之身
灑泣淚痕玉筯垂眼中之血與冰爭潔同鐵比堅
又司理孟有云葬舅姑娶妯娌勉力以相于先課
孤子撫稚孫殫心以裕其後皆實錄也

宋氏萬載辛應宸妻年二十一夫苦讀勞瘁終病革
撫氏泣慰宋應聲泣曰夫死阿亦死夫哽咽復以
完葬撫孤勉之氏唯唯自是人罕和其面夫與翁
姑三殯次第舉焉督孤振彩爲諸生年近七十終
詔旌表建坊

聞氏萬載生員歐陽餘慶妻夫因父死哭泣廢餐成
疾卒男璜甫數月氏欲殉夫姑力防之遂剪髮持
齋紡績奉姑後翁姑雙殯皆脫簪襄事訓子游庠
天啓三年旌表建坊

潘氏萬載吳嘉佐妻年二十三夫亾踰月生子有疾
求者卽引刀誓死家貧服勤以事孀姑哺腹子詔
旌之年七十終

彭氏萬載諸生張文綉妻年十八夫歿撫男大位讀書有欲奪之者輒齧指自盟至老寢不解衣閨門肅然

彭氏萬載邑椽李永芳妻年十六適李未五年夫歿居喪哀毀家饒于貲多求娶者彭截髮盟曰婦再醮生何面見人死何面見夫誓死不從繼邦相爲嗣年六十終

周氏萬載鮑紹文妻年十九夫亾遺腹一子家貧親族勸改適周截髮誓守養子娶媳子媳復連喪祖母及孫籲天對泣孫際明長教讀得館藉以奉餘年氏年九十知縣韋明傑請旌

鍾氏萬載生員張鉉妻司訓鍾美之女年二十五夫臨終囑曰老母弱子惟汝是賴鍾慟悼仆地孀居爲南解所累產盡鬻去其貧紡績以支門戶姑以壽終喪葬盡禮子星宿補諸生崇禎八年氏年六十一邑令請獎

鮑氏萬載袁汝棟妻年二十三夫死孤甫週家貧守志惟屏繡課子子德煒補諸生

吳氏龍三榜妻年二十六守節

蘇氏龍以會妻年十九守節

俱萬載人

周氏萬載歐陽體信妻年十七于歸未五載夫殞無嗣一女適孝廉袁汝祝周節義自守田業悉散給親族年七十五終

王氏萍鄉生員甘棠茂妻崇禎丁丑十一月楚賊潰萍夫婦俱被執賊欲污之王給曰夫在側且書生執之無用不若釋歸相從未脫也賊如其言遂擇生攜氏出城南過萍實橋投江施賊平邑令程之敦親臨江爲文祭之

甘氏宜春人父名啓元以貢官饒州教授氏年十七適劉一善性婉孌曉大義十九夫亾燕子氏拮据葬夫服除母家爲之計再適卽劉氏族姓亦以氏少寡無子義難強留氏曰我未讀書不知古節婦事但聞人言忠臣烈女有死無二常心識之今惟矢守此語紡織以終餘生雖之死無怨也遂中分其產以半遺二伯氏四十餘年安貧茹苦讎閒動循禮法平居親族罕見其面崇禎癸未氏年六十

同邑公舉節婦署郡事同知張陸秀邑令朱茂暲請旌如制乃冬月遭左兵搜掠挾氏勒其資氏大哭罵兵怒殺之

易氏宜春人廩生王道明妻性溫淑孝事舅姑癸未冬避賊遠村爲左兵搜獲牽其手易憤罵曰吾手豈可污奪刀自斷之復曰何不速殺我以激怒賊遂爲所戮事平道府旌如例同時各鄉婦女多不屈死者如選貢彭汝明妻張氏生員彭汝聰妻湯氏彭汝楫妻張氏等俱以不從賊遇害

劉氏貢生李京之妻宜春人性慈和治家有聲癸未冬偕子女避賊山中左兵搜獲之劉知不免即叱罵求速死左兵百計窘逼終不可奪遂死之

袁氏字鳳英年十八歸宜春生員彭士俊子克成癸未左兵至袁從姑易氏匿山中兵搜獲殺其姑挾袁欲與俱往袁哭罵不絕躍入江流兵刺死事平郡守傅元禎邑令朱茂暲彙請旌如制

柳氏萬載王道成妻年十五歸王舅歿姑病牀褥三年衣食溲溺皆親歷以爲常咸稱爲孝婦年二十

夫患痘時患痘者多死舉家避之柳不忍離日侍
夫湯藥夫卒柳死復甦後撫子祿長祿永俱廩生
永出繼崇禎癸未山寇竊發誠其黨母入王節婦
廬壽七十忽無疾終

龍氏萬載生員辛啓夏妻年二十夫卒遺孤近歲餘
氏痛哭求死姑鞠氏勸之曰若死如吾老何如孤
幼何龍忍死養姑脫簪珥延名師孤有過輒杖不
少恤孤名瓊補諸生

梁氏萬載生員袁開美妻廣西督學梁佳植妹也舅

孝廉汝祝梁年二十夫卒孤甫一週梁毀容奉姑
長齋禮佛訓子弘烈補諸生

嚴氏分宜生員李廷璋妻年十七歸李二十生子夫
歿哀毀異常勉終襄事矢志撫子獨處靜室拮据
紡績子士槐補諸生順治壬辰巡按張公嘉旌其
門

李氏分宜生員袁士賓妻賓早逝遺二孤其貧守節
上事翁姑拮据教子孀守五十餘年年近九十志
同一日真節孝貞慈之兼全者康熙乙巳督學王

公日藻給扁旌表額曰栢舟矢操男子鍊府廩生
子鍊府增生俱以孝稱博學能文

國朝

余氏宜春邑庠生范俱妻十六歸范有孝敬稱世齡
俱見背遺孤元升甫六月余厲志守節無何翁又
逝獨事姑十七年毘勉訓子時橫逆頻侵氏竭歷
門戶洊歷危險卒教子補諸生閭里推服院道旌
表如例順治四年冬卒

周氏萍鄉監生簡應薦妻事姑孝夫歿子幼誓以節
守順治丁亥六十終子元奇元彥皆庠生

張氏萍鄉劉家龍妻年二十二夫歿家益貧張撫棺

